

Pitani Pipia Kiyendo Topa Mundurumu Ungumu **1 Pita** **I Ungu Torumumunga Ungu** **Pulu Mare**

Imbo mareni Jisas ipuki tiringi imboma liko mindili tiringi wali Pitani Kraistingu imboma nimbe enge tipili i pipiamu topa panjirimu. Lino mindili nomolo mele mane tipelie lino i mai kombu umbulu tipolio Goteni konopu mon doromo uluma teamili nimbe tipelie mulu mai talo pora ningele konopu lepolio ulu toya tolima teamili nimbe mane tirimu.

Wai kerimu wendo ombalo wali, nu Jisas tiye naa kolko umbuni yu kinye meko yunge imbo mendepolomu molani nimbe Goteni nu enge tipili!

Pitani pipiamu tombaindo pulu polopa torumu ungumu

¹ Na Pita, Jisas Kraistini nanga kongonomu tendepuwi nimbe lipe mundurumu iyemuni i pipiamu topo, Goteni nanga imboma molangei nimbe kanopa ltimu imboma tiro. Eno enonga kombumu tiye kolko pungo, kombu Pontus provins kinye Galesia provins kinye Kapadosia provins kinye Esia provins kinye Bitinia provins kinye, aku kombumanga pali pungo angimele imboma topo tiro. ² I pipia topo tiro imboma eno oi

naa molangei Lapa Goteni eno oi Yunge imboma molangei nimbe pilipe kanopa imbi tipelie Yunge imboma nimbe mako torumumunga altoko moloringi kinye Mini Kake Telimuni eno Gotenga imbo kake telima molangei nimbe lipe tapondorumu. Jisas Kraistinga ungumu pilko liko tengen tiko molangei. Yunge mememuni eno Gotenga kumbekerena konopu kake tepe pepili molangei nimbe kulumie topili nimbe aku tepe lipe tapondorumu. Eno imbo aku teko moromelema i pipiamu topo tiro. Goteni eno kinye konopu noirimo mele kinye, eno konopu u nipili taka liko molangei nimo mele kinye olandopa olandopa pupili.

Altopo molopo kondopo kau pumolo nimbo konopu tipo nokopo moromolomunga Gote kapi nimbo yunge imbi nimbo ola mundemili ungumu

³ Linonga Awili Jisas Kraistinga Lapa Gote kapi nimbo yunge imbi lipo ola mundemili. Yuni lino mindili nangei nilka nalo lino paa kondo kolopa naa tombo nimbe tiye kolopalie Jisas Kraist ono kombuna makilipe ola molopili nimu aku ulumuni Goteni koinjo mololi ulu pulu koinjomu lino tirimu. Aku koinjo mololi ulumuni lino tepe enge tirimomunga Yuni mele pengama timbo konopu itemoma pali paimbo timbelo nimbo nokopo moromolo mele pora naa nimbelo. ⁴ Lino molomolo uluma timbo nimbe, nimbe panjirimu ulu akumu keri naa lepa, kalaro te naa molopa, pora naa nimbe waliwalima lepa kau pumbelo ulu akumu Goteni mulu kombuna onge wali timbo nimbe noindirimomu limolo nimbo, konopu tipo nokopo

moromolo. ⁵ Eno timbo nimo imboma, eno Kraist paimbo ningi ipuki tirimelemunga Gotenga engemu, kune tapoi mele, akumuni eno molko kondangei nimbe okoromo. Altopa mulu mai talo pora nimbelo kinye lipe tapondopa, mindili nolemala aulkena wendo lipe, yu kinye peya molko kondonge kombuna mepa pumbe aku ulumu wendo ombalo wali paa kamukumu liengei nimu. ⁶ Akumu pilkolio paa konopu tiko moromele, nalo kinye wali alaye kolo kau eno kinye umbuni lupe lupema wendo oromona konopu keri leko mindili noromele. ⁷ Umbunima wendo oromomunga pulumu i tepa: Goteni eno paimbo ipuki tirimele mele mandanje nimbe kanombaindo manda manjirimo. Enonga ipuki tili ulu akumu olandopa. Kou gol paimbo mele paa penga kou mone awili tepa purumo nalo akumu paa mandopa. Kou golomu teko kenjirimel kinye pora nimo nalo yu paimbo kou gol ltemonje, kanamili ningi tipena manda manjiko karomele. Aku tepa mele, eno kinye umbuni wendo oromomani eno paimbo Kraist ipuki tirimelenje nimbe manda manjipe kanopa, Jisas Kraist kelepa ombo mona angilimbelo wali Goteni eno konopu tipe kapi nimbe imbi nimbe ola mundupili nimbe i teli oi enonga enge ningi ipuki tirimele ulumu aku tepa manda manjipe karomo. ⁸⁻⁹ Jisas Kraist yu paimbo naa karomele nalo Yu konopu mondoromele. Kinye yu paimbo naa karomele nalo Yu paimbo ningi enge ningi ipuki tiko eno Kraist paimbo ningi ipuki tirimelemunga pulu akumu Goteni eno mini pali lipe tapondopa, mindili nolemala aulkena wendo lipe, Gote yu kinye peya molko

kondonge aulkena lipe mondoromo, akumunga paa olandopa tono koromele. Aku tono koromele mele ya maina tono koromele mele molo. Tono koromele mele paa olandopa akumu imbomando ningi tingei pereremele.

10-11 Mindili nolemala aulkena wendo lipe, molko kondonge aulkena lipe mondoromomunga ungu mare Gotenga iye profetemani Kraist oi naa opili ningi tiringi. Goteni altopa imboma we kondo kolopa lipe tapondombalo ulumundo oi ningi tiringi. Ningi tikolio, i ulumu te wali wendo ombalonje, Goteni kanopa ltimu iye nomi Kraist maina omba mindili nombalo ulumu kape, aku tembalo kinye ulu penga olandopama wendo ombalo mele uluma kape, Kraistingu Mini Kakemu enonga konopuna tukundo molopalie nimbe tirimu ulu akuma ambe tepa wendo ombalonje ningi Kraist oi naa opili aku iyemani enongan waliwalima konopu kimbo tiko waltindiko, akumunga pulumu paa wamongo kororingi. **12** Goteni aku iyemani yunge kongono tenderingi aku kongonomu eno enongan lipe tapondombalo kongonomu molo nimbe, nimbe para tirimu. Ulu altopa wendo ombalo oi ningi tiringi ulu akuma eno molangei wendo naa orumu. Ulu altopa wendo ombalo oi ningi tiringi ulu akuma, kinye moromele imboma enonga ningi, oi ningi tindiringi. Jisasinga kongono iyemani kinye moromele imboma ningi tirimele unguma Goteni oi aku iyemando nimbe tirimu. Aku unguma altopa kinye mulu kombuna Mini Kake Teli lipe mundurumumunga engemuni Kraistingu ungumu andoko ningi

tirimele iyemani ungu tukumemu ningo tiringina pileringi unguma. Enselemani kape eno ningo tirimele ungumanga puluma paa pilemili ningo moromele.

Ulu pulu kerima paa naa tepo Gotenga imbo kake telima kau molamili nimbe Goteni lino alako toromo

¹³ Akumunga enonga konopuma kongono enge nimbe tepili ningo liko tumbi tindiko, ulu tengema wamongo pilko kondoko teko, Jisas Kraist altopa ombo mona angilimbelo wali Goteni eno paimbo we kondo kolopalie tepea limbelo ningo ipuki tiko nokoko molaio.

¹⁴ Oi eno i ungumu naa pilko we moltkolio ulu kerima konopu mondoko pilko terengi mele kinye aku ulu naa teangei nalo unguma pilko tenge tiko teremele bakuluma mele molaio. ¹⁵ Eno nanga imboma molangei wangei nimbe walipe pilerimu iyemu paa kake tepili ulu pengama kinye ulu tumbi nilima kinye kau teremo ulu pulumu peremo. Aku iyemu moromo mele eno aku teko waliwalima Gotenga imboma kau molamili ningo eno enongan Gote manda leko, uluma pali tengeindo eno kake tepili molko, ulu pengama kinye ulu tumbi nilima kinye teko molaio. ¹⁶ Akumunga ungu te Gotenga bukuna moromo, akumu i tepea:

Goteni nimbeindo, “Na enonga Gote kake tepili ulu pengama kinye ulu tumbi nilima kinye kau tepo moro kani eno aku teko Nanga imboma ningo konopu kake tepili molko ulu tumbi nili pengama kau teko molaio,” nimu. *(WKP 11:44-45, 19:2, 20:7)*

*Imboma yando liembo nimbe Goteni mele paa
penga te tirimu ungumu*

¹⁷ Eno Ara Gote ningó waltindiko Yu kinyé ungu nimele iyemuni imbomanga imbima pilipelie enoni ulu teremelema naa moke tepe karomo. Imbomanga yu mele mele uluma moke tembaido enonga imbima naa pilipelie eno pali tumbi tipe moke teremo. Aku Araya nimele iyemuaku tepe moromo kani mai kombuna molkolio i kombumu linonga paimbo kamukumu kombumu molo. I mai kombuna imbo ombo angilima moromolo ningó pilkolio Yu iye paa awili olandopamu ningó yunge unguma liko awili tiko pilko molangei. ¹⁸ Yuni enonga nimbe tenderimu mele pilkolio aku teko molangei. Eno pimele, enonga lanieli kolenalema konopu kimbo naa tiko we moloringi mele eno yandopa yandopa aku teko moloringi mele Goteni tiye kolko molko kondonge aulkena pangei nimbe lipe tapondopa wendo ltimu akumu wendo liembo nimbelie kou silva molo kou gol teni pame kot wendo naa ltimu. ¹⁹ Nalo Kraistinga meme paa mele awilimuni Goteni eno lipe tapondopa wendo ltimu. Kraist yulupe molo uru te paa naa peli kongi sipsip walo mele molorumumu, yunge mememuni aku tepe terimu. ²⁰ Goteni mulu mai talo oi naa tepalie Kraist aku kongonomu tepili nimbe kanopa ltimu iyemu, kinyé moltomolo walima pora nimbei teremo wali yu enonga nimbe lipe tapondombaindo maina mainye ombo mona molorumu. ²¹ Yuni enonga nimbe tenderimu mele pilkolio Yu imbo ono kombuna topa makinjipelie Yunge imbi paa ola molopili nimu Gote paimbo ningó ipuki tir-

imele. Aku terimumunga eno Gote kau paimbo ningi enge ningi ipuki tiko, Yuni altopo tembo nimbe, nimbe panjirimu mele paimbo tembalo ningi konopu tiko nokoko moromele.

Linonga angenupilima paa konopu mondamili ungumu

²² Eno ungu paimboma pilko liko tenge tiko teremele aku ulumuni enonga konopuma kulumie tondoringi, konopu kake tepili moromelemunga kolo toko angenali konopu mondromolo naa ningi, paa konopu mondromole kani kinye angenali kinye konopu paa enge ningi mondaio. ²³ Langi imbo poinyena panjirimele wali muli topa wendo omiba purumo mele eno aku tepe mele melteni kelepa wali talo tepe merimuna imbo koinjoma moromele. Langi imbo manda wendo naa omiba, omiba keri lepa koromo imbomuni eno naa merimu. Nalo langi imbo wendo omiba molopa kau purumo akumuni eno altopala merimu. Aku langi imbomu Gotenga ungumu, akumu molopa kau pumbekoinjo mololi ungumu. Akumuni eno altopala merimu. ²⁴ Aku ungumu pora naa nimo mele ungu te Gotenga bukuna moromo, akumu i tepe: Imboma pali era mele, eno molko kondoromele kondipe tindi mele. Erama koromo wali kondipe tindima oo lepa maina mainye purumo

²⁵ nalo Awilimunga ungumu waliwalima lepa kau pumbelo. *(Ais 40:6-8)*

Aku ungumu eno ungu tukumemu ningi tiringi.

2

Awilimu kou koinjo mololi pengamu moromo

¹ Eno altopala merimuna koinjo moromele kani enoni i teko teangei: We imboma teko kenjirimele uluma kinye, konopuni lupe pilko liko kerena lupe kolo toko ningi topele mapele toli uluma kinye, we ulu lupe mare teko kolo toli uluma kinye, imboma mele awini noiko molko kondoromele mele kanokolio yakela kolko konopu keri panjili uluma kinye, imbo tengi ungu umbulkondo nindili uluma kinye, ulu keri akuma waye tiye kolaio. ²⁻³ Awilimuni eno kondo kolopa we tepa kondoromo mele alaye kolte pilkolio pilko penga pilerangi kani bakulu kiki ame paa omani koromele mele eno aku teko ame pengamu, mele keri te naa peli ame, akumu omani kolangei. Aku amemuni eno tepa enge timbelona enonga konopu enge pepili eno akoko awili leko Gote kinye penga teko koinjo molonge.

⁴ Eno Kraist moromona wangei. Yu kou koinjo mololi melemu. Imbomani yu keri ningi pilkolio liko lteringi nalo Goteni yu kanopa paa penga nimbe kanopalie mako torumu. ⁵ Eno peya kou koinjo mololi mele moromele. Ulke mare kouni takoromele mele Goteni yunge Mini Kake Telimunga ulkemu takondombaindo eno kanopa lipelie ulke takombalomunga kou melema nimo. Eno Gotenga kapi nili imbo kake telima moromele. Kapi nili iyemani Gote kapi ningeindo yuni kanopa penga pilerimu melema kalko yu tiringi aku teko eno enongan Gote kapi ningeindo yu kanopa penga kanombalo melema

tiengei. Aku kinye, Jisas Kraistini enonga nimbe tenderimumunga Gote mele tingema Gote yuni paimbo kanopa penga pilipe limbelo.

⁶ Akumunga ungu te Gotenga bukuna moromo. Akumu i tepa:

Nani kou paa penga te, ulke ponga mele polko,
ulke enge nipili ningo timu mele polangei
nimbo kanopo ltiu, aku koumu paa olan-
dopa mulu Saionona noiro.

Aku wali Yu paimbo ningo ipuki tinge imbomani
pipili naa kolko konopu keri naa panjing.
(Ais 28:16)

⁷ Eno Kraist paimbo ningo ipuki tirimele imbo-
mani aku koumu kanoko penga pimele nalo Yu
naa pimele imbomani Yu kanoko keri pimele mele
i tepa:

Ulke takoringi iyemani kanoko kerire konopu
leko toko lteringi kou akumu, kinye ulke
timu mele ulke enge tili kou awili pengamu.
(Sng 118:22)

⁸ Ipuki naa tirimele imbo akuma kinye, aku
koumu kinye, i tepa mele nimbe peremo:

Aku koumu yu kou kelo te, imbo te kambu-
rumu wali kika tepe, tepe ai tondombai
teremo. Yu kou awili teni imbo topa mainye
mundurumo kou mele. *(Ais 8:14)*

Aku imboma Gotenga ungumu liko tui tirimele-
munga tepe ai tondoromo. Goteni oi aku tepe
nimbe panjirimu.

⁹ Nalo eno Paimbo ningo ipuki tirimele imboma
aku tepe molo. Eno yuni kanopa ltimu imbo
talapemu molko, iye nomi kingimunga Gote popo

tondoli imboma molko, yunge kau molongemunga imbo kake telima molko, paa Gotenga imboma moromele. Yuni aku teko molangei nimbe eno mako torumumunga pulumu i tepa: eno tumbuluna moloringi wali Goteni akuna wendo ongo nanga pa teli paa pengamunga tukundo waio nimu. Aku Gote Yuni Yu molopo kondoro mele kape tepo penga tero mele kape imboma pilengei kapi ningi temane toko tiengei nimbe eno Nanga imboma molangei nimbe kanopa ltimu. ¹⁰ Eno oi we imboma moloringi nalo kinye eno Gotenga imbo talapemu moromele. Oi ulu pulu keri teringimunga Goteni eno kondo kolopa enonga ulu kerima tiye kololi ulu te eno kinye naa perimu nalo kinye yuni kondo kolopa ulu pulu kerima we tiye kololi ulumu tirimuna ltingi. Kinye eno kinye peremo.

*Tawendo moromele imboma molongena lino
tumbi tipo andopo molamili ungu*

¹¹ Nanga konopu mondoro imboma, nani eno enge nimbo konge tepolio i mai kombuna eno imbo ombo angilima mele, imbo ponenge mele moromelemunga enonga konopumani ulu kerima teamili nimele mele paa liko umbulu tiengei. Kangina oi we konopu keri peremomani eio konopu ltemo ulumani enonga minima tepo beambo tiemili ningi waliwalima minima kinye opa teremele. ¹² Eno tawendo imboma molongena pungolio ulu pengama kau teko tumbi tiko molangei. Tawendo imboman kinye paimbo enondo teko kenjirimele imboma moromele ningi ungu umbulkondo nindirimele nalo enoni

ulu pengama tengena kanokolio altoko Gote imboma molongena ombalo walimunga aku imbomani Gotenga imbi ninggo ola mundengei ninggo aku teko ulu pengama teko tumbi tiko molangei.

Lino nokoromele imbo nomi awilima lipo awili tiemili ungumu

¹³⁻¹⁴ Awilimunga imbi ola molopili ninggo gavman iye palinga unguma liko awili tiko pilko molaio. Iye nomi kumbena kingimu kinye kape, provins gavman kumbe leko moromele imboma kingimuni kanopa lipe teko kenjirimele imboma mindili nangei ninggo, teko kondoromele imbomanga imbima kapi nengei pangei nimbe kombumanga lipe mundurumoma kape, aku iye awilimanga pali unguma liko awili tiko pilko molaio.

¹⁵ Liko manjeio, imbo keke lepo tolimani enoni teko kenjirimele ninggo ungu te naa pepili nimbe Goteni eno Kraistinga imboma ulu pengama kau teko molangei konopu ltemo. ¹⁶ Ungu mane teni naa nokopa ulu kerimanga kendemande imboma naa molkolio we moromele mele eno aku teko andoko molaio. Nalo ungu mane teni lino naa nokoromunga ulu kerima temolo lemo ulure molo ninggo ulu kerima andoko naa teaio. Lino Gotenga kongono kendemande imboma ninggo yunge kongono kendemande imbomani teremele mele aku ulu teko molaio. ¹⁷ Eno pipia topo tiro imbomani imboma pali teko kondoko, unguma liko awili tieio. Paimbo ninggo ipuki tirimele angenalima konopu mondoko, Gote pipili kolko liko awili tiko, iye nomi kingimu wale pakaio.

*Gotenga kongonomu tendepolio mindili
nomolomunga ungumu*

¹⁸ Eno mele pengama naa liko kongono we tendeli imboma, enonga nokoli imbomani ungu ningema taka liko pilko liko awili tiko molaio. Eno kinye karaye naa teko taka liko nokoromele nokoli imbomanga unguma kau pilko liko teangei nimbolio naa nio nalo eno mindili tiko teko kenjirimele nokoli imbomani ninge unguma kape pilko liko teangei nimbolio nio. ¹⁹ Aku niomu i tepo pilipolio nio. Gotenga unguma pilko likolio teko kondonge wali imbomani eno teko kenjiko teko mindili kondonge lemo manda, mindili nomolo kinye manda nalo tepo naa kenjipo Gotenga ungu olandopamu kumbe lepo pilipo temolo ninge wali Goteni konopu timbelo. ²⁰ Teko kenjingemunga mane tiko teko mindili kondonge wali konopu enge nipili moltolio manda, lino tepo kenjimolomunga paimbo mindili tirimele kani we mindili namili ninge kinye imbomani eno kapi ningeya? Aku molo. Paa mindili nonge. Nalo teko kondongemunga mindili tinge kinye we mindili nongo pundu naa toko we tiye kolonge lemo paa. Aku tenge kinye Goteni kanopa penga pilimbelo. ²¹ Eno ulu keri te naa tekolio mindili nangei nimbe Goteni eno nanga kongonomu tendangei waio nimbe eno alako torumu. Kraist yu Goteni tewi nimu mele tembaindo enonga nimbe mindili norumu, aku ulumu eno aku teko manda leko tenge mele lipe ondorumu. Akumunga Goteni teao nimo ulu akuma teamili ningolio teangei mindili nonge.

²² Kraist yu tepa molorumu mele Gotenga

bukuna ungu te i tepa nimbe moromo:
 Yunि ulu pulu keri te naa terimu. Wali te kape kolo
 topa ungu te paa naa nimu. *(Ais 53:9)*

²³ Yu ungu taka tondoko iri toko teringi wali yuni
 enondo ungu te topondopa naa nimu. Enoni yu
 we mindili tiringi nalo Yu we mindili nambo
 nimbeline ungu te naa nimu. Kot pilipe uluma
 pali tumbi tipe moke teremo Iyemuni yu teko
 kenjiringi imbomanga kot tendembalo nimbe
 pilipe enoni yu teringi ulu tiye kolorumu. ²⁴ Yunি
 linonga ulu pulu kerima Nangama nimbeline
 akuma yunu mepa unjo polopeyana kolorumu.
 Aku tepalie lino imbo ulu keri teremoloma naa
 teamili nimbo kamukumu tiye kolopolio ulu
 toya tolima kau teamili nimbo koinjo molamili
 nimbe yuni aku ulu terimu. Imbomani yu toko
 mindili tiringimunga eno koinjo puringi. ²⁵ Kongi
 sipsip lupe lupe purumele mele eno aku teko lupe
 lupe puringi, nalo kinye enonga minima nokopa
 tapu teremo iye Kraist moromona yando ongolio
 moromele.

3

*Ambo iye pulimanga kinye iye ambo lilimanga
 ungumu*

¹⁻² Oi nindu aku teko mele amboma eno enonga
 iyemanga unguma pilko omenalinga maindo mo-
 laio. Amboma enonga iye mare Gotenga ungumu
 pilko naa limelemani enonga ambomani ulu
 penga tumbi nilima kau teko, iyemani ungu
 ningema wamongo pilko taka liko molonge ulu
 kanokolio konopu topele toko Gotenga iyema mo-
 lamili nengei ningolio eno amboma aku ulu teko

molaio. ³ Eno ambo pengama kanoko nengei ningko kangindo kau au tiko pinyendima lapie langoko, kou goloni teli mele pengama nomina leko, wale pakoli penga kou awili purumoma pakoko, aku ulu naa teaio. ⁴ Eno ambo pengama kanoko nengei ningolio mele paa tiperipe keri naa lembalomani enonga konopuna tukundo au tieio. Aku uluma i tepa: Eno konopu penga pepa, konopu tendekuna pupili taka liko molonge ulumu. Aku ulumu kanopalie Goteni ulu paa penga olandopamu nimbe karomo. ⁵⁻⁶ Koro oi Goteni lino kinye tembo nimo mele paimbo tembaloo ningko pilko nokoko moloringi ambo kake telimani lino au nemili ningolio aku teko taka liko moloringi kani pilkolio aku teko molaio. Sarani iye Abrahamenga unguma pilipe lipe, yundo nanga nokoli iye awilimu nimu, aku tepa mele, aku ambomani enonga iyemanga unguma pilko eno liko awili tiko moloringi. Eno ambomani aku teko enonga iyema kinye ulu pengama teko melte pipili naa kolonge lemo eno Saranga lemenupili moromele.

⁷ Iyema, eno aku teko enonga amboma kinye molongeindo amboma molko kondangei ningko eno konopuni wamongo liko manjeio. Ambomanga kangima enge te naa peremo kani eno iyemani amboma liko tapondaio. Goteni molopa kondopa kau puli ulu pulumu eno iyema kau naa timbelo. Amboma kape timbelola ningko pilkolio amboma kinye aku ulu teko molangei. Eno iyemani Gote kinye ungu nimbo konge temolo kinye ulu teni linonga unguma pipi na tipili ningko enonga amboma kinye aku ulu teangei.

Imboma kinye ulu pulu tumbi nilima kau teamili

⁸ I pipia toromu topo pora tiemboi, ungu te peya kamukumu nemboi. Eno enonga konopuma tendekuna pupili popo tipo molamili ningokandi angenupilimani nendo yando kondo kolko konopu mondoromele mele aku teko enoni nendo yando Kraistinga imboma linonga angenupili ningokondo kolko konopu mondoko, liko tapondoko, eno imbi ola mele molopili, lino imbi mainye mele molopili ningotaka liko imbomanga unguma pilko molangei. ⁹ Yando eno kinye teko kenjingewali nendo pundu naa taio! Yando iritoko ungu keri te ningewali nendo pundu naa taio! Yando eno teko kenjingewali nendo tepo kondopo lipo tapondamili ningogotenieno tepe kondopa, eno konopu tiko molko kondangeinipili ningogote enonga ningokongetendangei. Aku ulutenge lemo oi Goteni eno lipo tapondopo tepo kondambo waio nimumele paa tembalo. ¹⁰ Aku nioungumunga ungu te Gotenga bukunamoromo mele i tepe:

Imbo teni na manda molopo, konopu tipo molambo nimbeline yungukeri te naanimbo, kolo naatambo nimbe yunge keremu nokopili.

¹¹ Ulu pulu kerima tiye kolopa umbulu tipe ulupengamatepili. Imboma kinyekonopu tendekunapupili ulupulumupepilinimbeakuulumenge nimbe tepili.

¹² Aku ulu pengama ambe temona akutepatepiliya? Akumunga pulumu nemboi: Awilimuni imbo ulutumbi nilimateko moromeleimbomakanopapengapilipe, enoni

yu konge teko ninge unguma waliwalima
 komu tendepa moromo, nalo ulu kerima
 teremele imboma lipe umbulu tirimo kani
 yuni aku tepa tepili. *(Sng 34:12-16)*

Kraist lombimele imboma mindili nonge ungumu

¹³ Ulu pengama kau teamili ningo molonge wali narini eno mindili lipe timbeloya? ¹⁴ Nalo ulu tumbi nilima tengen wali akumanga paa mindili nongo molonge lemo eno malo. Imbomani eno teko pipili kondongei tengen lemo eno pipili na kolko mini naa lteao.

¹⁵ Enonga konopuna lino Kraist Yunge kau molopo, Yunge ungumu kau pilipo lipo tepo molamili ningo Yu kau linonga Iye Awilimu molopili ningo Yu kau pipili kolaio. Aku kinye eno aku ulu teko wali penga wendo ombalo wali nokoko molonge kinye imbo teni kanopalie, eno aku teko ambe temona teko moromeleya nimbe walipe pilimo lemo enoni nendo ungu te topodoko enonga ulu teremelemanga puluma ningo tinge mele liko tumbi tiko molaio. ¹⁶ Nalo enonga konopuna ulu keri te paa naa pepili neio. Pele eno Kraist pilko ambolkolio molko kondoromele mele aku ulumunga imbomani eno teko kenjirimele. Kolo toko ningo enonga ungu umbulkondo nindinge wali eno ulu keri te naa pepili molongena aku imboma pipili kolongei taka liko ningo tumbi tieio. ¹⁷ Goteni lino mindili nangei nimbelomunga ulu penga te tepolio mindili nomolo lemo aku penga. Lino ulu kerima tepolio mindili nomolo lemo aku keri. Kraistini Lino mindili nombo molopo kenjilimala aulkena wendo limbeindo yu

kolopa makilipe ola molorumu. ¹⁸ Kraist iye penga te molopalie mindili norumu mele pileio! Yu iye tumbi nilimu molopalie, ulu keri teli imbomanga kolo wangopa kolorumu. Enonga ulu pulu kerima pali kamukumu mainye pupili eno Gote moromona pungo popo tiko molangei nimbe Kraist wali tendeku wali kau kolorumu. Yunge kangimu toko kondoringina kolorumu nalo altopa Mini Kake Telimuni yu makinjirimuna ola molopa mulu kombuna pumbe molorumu mele moromo. ¹⁹ Mini Kake Telimunga engemuni kangimu kolopa liepili imbo koloringimanga minima ka ulkena moloringina pumbe unguma nimbe tirimu. ²⁰ Aku minima oi Noa molorumu wali Gotenga ungu nimuma naa pilko, liko umbulu tiko moloringi imbomanga minima. Imboma ulu keri awini teringi nalo Goteni welea pundu naa torumu. Noani sipimu takopa molopili imboma oi naa tambo nimbe taka lipe nokopa molorumu. Altopa Noani sipimu takopa pora tirimu wali Goteni no topa imboma topa kondopili nimu kinye imbo ki talo kau noni naa torumu. Aku imbo pokore kau Goteni naa kolko koinjo pangei kani sipina tuku pangei nimbe lipe tapondopa nona wendo ltimu. ²¹ Aku nona imbo ki talo naa kolangei nimbe lipe tapondopa wendo ltimu. Kano nomupe, kinye no ltimele ulu pulumu lipe ondoromo. No ltimele nomuni kangindo ulure naa tepa, kangina kalaro moromoma kulumie topa wendo naa ltindirimo. No ltimelemuni eno i teko nimele: “Gote, no ltio kanowi. No ltio aku ulumuni na ulu kerima naa tembo,” ningi mi leko nimele. Goteni Jisas Kraist imbo ono kombuna

topa makinjindirimungu no ltimelemuni eno lipe tapondopa mindili nolemala aulkena wendo lipe, yu kinye peya molko kondonge aulkena lipe mondoromo. ²² Aku iyemu Yu makilipe ola molopalie mulu kombuna purumu. Kinye yunge imbi ola molopili Gotenga imbo kindo molopa, mulu kombuna enselema kape, maina imbo awilima kape, kuro enge nili awilima kape, aku-manga pali Yu iye Awilimu molopa nokoromo.

4

Oi konopu kerimunga unguma pilipo terimulu mele tiye kolamili

¹ Akumunga, Kraist yunge kangina mindili nombalie ulure molo nimbe tiye kolorumu mele pilkolio eno kape yuni konopuni pilerimu mele aku ulu teangei. Imbo teni yunge kangina mindili nomba umbuni meremo imbomu ulu pulu kerima tiye kolopa altopa naa teremo. ² Aku tepalie imbo akumuni oi naa kololi, kangimu kinye we molopalie yunge konopu oimuni konopu mondoromo ulu kerima naa teremo. Yu Goteni tewi nimo uluma kau teambo nimbe teremo. ³ Tawendo moromele imbomani pilko teremele mele eno Kraistinga imbomani oi aku teko teringi. Nalo aku uluma wali paa awini oi teko moloringi mele manda teko, kinye tiye kolaio. Aku uluma i tepa: Ambo iyema kinye andoko wapera toko ulu kerinale teko kenjirimele ulumu kinye, ulu kerima tengindo teamili ningi teremele ulumu kinye, no nongo keke lepo toromele ulumu kinye, liko maku toko no enge nili awini nongo keke lepo toko ulu kerima

awini teremele ulumu kinye, Goteni ungu mane nimbe panjirimuma liko umbulu tiko Goteni paa kanopa keri pilipe kalaro mololi uluma nimbe karomo uluma tengeindo we melemare liko anjiko lino nokoromele gotema ningko kuro popo toko kapi nimele ulumu kinye, tawendo imbomani aku teko uluma teremele mele enoni oi aku teko wali awini teringi.⁴ Kinye eno tawendo imboma kinye tendekuna molko aku ulu pulu keri awini konopu mondoko teremele mele naa teko moromelemunga kanokolio tawendo imbomani oi teringi mele naa teremele ningko mini lteko eno iri toko ungu taka tondoromele.⁵ Nalo koinjo mololi imbomanga kape kololi imbomanga kape, pele walite kot pilipe, enoni ulu teremelema apurupe moke tembaindo moromo iyemu kot pilimbeindo molombalona angilinge. Yuni aku ulu teko kenjirimele imbomando ambe temona aku uluma teringiya nimbelo wali enoni ulu teremelema yundo paimbo ningko ting.⁶ Imbomanga teremele uluma moke tembalo akumunga oi koloringi imbomani oi naa kololi wali ungu tukumemu pilko ltingi. Paimbo maina moromele imboma kolonge mele koloringi nalo kinye minima koinjo pungo Gote kinye molko kau purumele.

Goteni we tipe kalopa tirimu uluma tepo kondamili

⁷ Maina melema pali pora nimbelo walimu nondopa wendo ombai teremo kani eno imbo konopu pepili enonga uluma nokoko kondokolio, Gote kinye ungu ningko molangei.⁸ Nalo aku ulumanga ulu olandopa te Gotenga imboma eno enongano

nendo yando enge ningko konopu mondoko molaio. Aku ambe telka enonga konopu mondoli ulumuni imbomani eno ulu keri awinima pange tenderemo. ⁹ Gotenga imbo te enonga ulke tengalombalo wali eno ulke pulu imbomani konopu keri naa panjiko yu molamili owi ningko nokoko kondaoio. ¹⁰ Goteni kongonoma teko kondangei nimbe eno yu mele mele we kondo kolopa enge lupe lupema moke tepa we tirimo. Enge akumani eno nendo yando liko tapondoko molaio. Gotenga kongono tendeli imbo pengama molkolio aku ulu teaio. ¹¹ Imbo teni ungu nimbe timbelo lemo Gotenga unguma wamba nimbe tipili. Imbo teni imbo marenga kongono tendembalo lemo Goteni enge tirimomuni kau tendepili. Ulu temoloma pali imbomani kanokolio Gote kapi ningko Yunge imbi liko ola mundengei ningko Jisas Kraist peya kopu teko molkolio aku uluma teaio. Yu imbi kamukumu ola molopa kau pumbe, yunge engemu waliwalima pepa kau pupili moromo. I paa.

*Kraistingu imboma molopolio mindili nomolo
kinye ulure molo nemili ungumu*

¹² Nanga konopu mondoli imboma, eno manda manjirimo ulu umbuni te tipeni mele, eno mindili tirimo. Aku ulumu ambe temona wendo oromoya ningko konopu liko naa mundengei. ¹³ Kraist mindili norumu mele lino mindili noromolomunga paimbo mindili noromolo ningko tono kolangei. Yunge enge pa telimu kinye imbi ola molopili ombalo kinye lino konopu penga tepo lemolo ningko aku konopu leko mindili nongo molangei. ¹⁴ Eno Kraistingu imboma moromelemunga ungu taka tondonge lemo paa enge pepa

imbi mololi Minimu, Yu Gotenga Minimu, eno kinye moromomunga eno malo. ¹⁵ Eno mindili nonge lemo imbo toko kondonge molo melte wapu linge molo gavmanenga ungu mane lupe lupema toko tangondoko ulu te teko kenjinge molo imbo tengah kongono teremomu teko embambo tingemunga mindili naa nangei. ¹⁶ Nalo eno ipuki tiko moromelemunga mindili nonge lemo pipili naa kolangei. Eno Kraistinga imboma moromele ninggo pilko Gote kapi ninggo imbi liko ola mundeio. ¹⁷ Goteni imboma moke tembaindo yunge imboma kumbe lepa moke tembalo walimu oi wendo ombai teremo kani konopu tiko mindili nongo molangei. Altopa, Goteni lino aku tepe kumbe lepa kot tendepalie aku teko mindili nangei nimo lemo Gotenga ungu tukumemu liko umbulu tirimele imboma kot pilipelie, ambe tembalonje? ¹⁸ Aku niomunga ungu te Gotenga bukuna moromo. Akumuni nimbeindo:

Imbo konopu tumbi nipili moromelema tepe limbei pereremo lemo Gote umbulu tiko ulu pulu kerima teremele imboma ambe tengeya? *(Snd 11:31)*
nimbe peremo.

¹⁹ Akumunga, Goteni mindili nangei niomunga mindili noromele imbomani mulu mai talo kinye lino imboma kinye tepe wamopa terimu Goteni tembo nimbe, nimbe panjirimo mele paimbo tepe, waliwalima lino nokopa kondopa tiye naa koromo ningolio enonga konopu kangima kinye pali Goteni nokopili ninggo yu tiko, ulu pengama kau teko molangei.

5*Kraistingu talapena imbomanga tapu iyemanga ungumu*

¹ Eno kinye moromele tapu iyema, eno tapu iye moromele mele na kape aku tepo tapu iyemula moro. Na Kraist mindili norumuna kanoru iyemu, na Gotenga mulu kombuna enge pa teli nondopa mona lembalo ulumu Kraistingu imboma kinye peya limolo iye tela, nani eno kinye moromele tapu iyemando paa enge nimbo konge tepolio nimboi: ² Gotenga sipsip eno nokoromelema wamongo tapu teko kondao. Goteni i kongono eno teangei nimbe tirimu akumu teaio nimo kani teamili ning konopu keri panjiko we naa teangei. Konopu u nipili teangei. Goteni teaio nimu kongono akumu kou mone limolo ning naa teangei. Imboma paa lipo tapondopo nokamili ning paa konopu tiko teangei. ³ Goteni eno nokangei nimbe tirimu imboma mandoko molangei, linonga imbima paa olandopa molopili ning eno mindili tiko naa nokangei. Eno nokoromele sipsipima molonge mele eno tapu iyema aku teko ulu pengama kau teko molangei. Enoni kanokolio manda leko teangei ningaku ulu teko molaio. ⁴ Sipsipima aku teko nokoko molonge wali Sipsip Tapu Iye Awilimu ombalo kinye eno wainye alipu mele pakondombalo akumu waliwalima keri naa lepa, we lepa kau pumbelo mele pengamu linge.

Goteni lino nokopa kondombalo nimbo takalipo molamili

⁵ Iye kokelema, aku teko mele eno iye yumanga unguma taka liko pilko iye yuma maindo molangei. Gotenga bukuna ungu te nimbe moromo akumu i tepa:

Na awilimu moro, na lipe manjili peremo iyemu, imbo lupema enge te naa peremo ningononga imbima we liko ola mundurumele imboma Goteni yunge opa pulema nimbe tepa manye mundurumo,

nalo imbo enonganona imbi naa mololi imbo kerimu, imbo lupema lipe manjilima peremomunga unguma taka lipo pilipo molambo nimele imboma we kondo kolopa tepa kondoromo.

(Snd

3:34)

Aku tepa nimbe moromo kani eno enonganano pali nendo yando lino imbi naa moromo ningotaka lipo molamili neio. ⁶ Aku tepa ungu te moromo kani Gote yu paa enge pepili imboma nokoromo ningononga enoni na awilimu naa molambo, na imbi naa molopili ningononga eno enonganano imbi manye munduko taka liko molaio. Aku ulu temolo kinyeyunu pilimbelo wali tengateng linonga imbima lipe ola mundumbelo ningonogo aku ulu teaio. ⁷ Yuni eno kondo kolopa nokopa moromo kani yu moromona pungo enonga konopuna umbuni pembaloma kinyemini ltengema kinyeyundo ningonogo para tieio.

⁸ Laion engele kolopalie kongi te topa nombaindo andoromo mele aku tepa enonga opa pulekuromanga nomi Sataneni na imboma ambolopo tepo kenjembo nimbe aku tembaindo andopamoromo kani eno imbo konopu pepili molko,

waliwalima kanoko kondoko molaio. ⁹ Eno lino konopuna umbuni tepili moromolo mele we mai kombuna pali moromele imbo angenupilima aku teko umbuni tepili moromelela ningi pilkolio Goteni eno waliwalima nokopa kondoromo. Akiliao kape kinye kape yuni eno tiye naa kolombalo ningi ipuki tiko molkolio Satan nanga opa pulemu, yuni na naa ambolopili ningi yunge ungumu naa pilko, we mele none tendeko, yu toko wendo mundeio.

¹⁰ Eno wali alaye kolte umbuni tepili molonge wali Gote yuni yunu eno kelepa tukundo lipe, eno nanga imboma moromele mele tiye naa kolko enge pepili molangei nimbelo. Eno we kondo kolopalie yuni altopa eno yu peya kamukumu yunge enge pepa pa tepa kau puli kombuna peya molamili wangei nimbe ya maina manyendo tirimu iye nomi Kraist akumuni linonga nimbe tenderimumunga Goteni linondo aku tepa manda nimbelo. ¹¹ Gote yu kinye engema pali pepa imbi ola molopa kau pupili moromo. I paa.

Pipia topa pora timbeindo ungu mare torumu

¹² I pipia ponjili topo tiromu Sailasini tondoromo. Yu kongonoma tiye naa kolopa paa enge nimbe teremo angenumu nimbo pilipo moro. I pipia toromu Goteni imboma we kondo kolopalie lipe tapondoromo mele pilengei nimbo toro. Goteni imboma kinye paimbo konopu noipe mondoromomundo nio akumu paimbo ningi pimele mele tiye naa kolko, enge ningi molangei.

¹³ Kraistinga imbo talape kombu awili Babilon moromelema, aku imboma kinye eno pipia topo tiro imboma kinye Goteni oi Nanga imboma

molangei nimbe kanopa ltimu aku Babilon* imbo-
mani molko kondao ning, ning mundurumele.
Nanga malo Makoni eno molko kondao nimbe,
nimbe mundurumola. ¹⁴ Eno enongano nendo
yando kondo kolko ki liko molko kondao neio.
Eno Kraist kinye kopu teko moromele imboma
pali konopu u nipili taka liko molangei. Aku peya
nio.

* **5:13:** Pitani Babilon manda lepa Rom kombundo nimu konopu
itemele.

UNGU TUKUMEMU
The New Testament in the Imbo Ungu Language of
Papua New Guinea
Nupela Testamen long tokples Imbo Ungu long Niugini
copyright © 1997 The Bible League

Language: Imbo Ungu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files
dated 9 Oct 2020

8e236e4f-bf7f-5fe1-a0ea-4f115d5cbf7e